

欽定剿平粵匪方略

欽定勦平粵匪方略卷四十 癸丑年

五月十六日 庚申 訥爾經額奏言探聞河南歸德

府失守距長垣縣僅二百餘里 臣恐黃河口岸

兵力尙單且慮該鎮董占元一人勢難兼顧查

有現署正定鎮之新授山東兗州鎮總兵花里

雅遜布甫經卸篆起程赴任該員曾任開州協

副將並兩次署理大名鎮總兵於地方情形熟

集賢堂  
卷四  
一  
悉現當籌防喫緊差委乏員合無仰懇

聖恩俯准暫留該總兵在直挑帶正定鎮兵五百名馳赴大名會同董占元相機布置以期得力臣仍一面札飭藩司張集馨與已革副都統德順帶同臨洺關駐防之宣化鎮兵一千名一併前赴大名會同董占元籌商擇要屯駐統計大名地方前後調撥防兵共五千名臣已諄飭該鎮等

體察情形熟籌防範務使黃河北岸聲勢聯絡  
以固藩籬臣俟省署應辦要件料理就緒亦卽  
出省督辦奏入

上命軍機大臣傳諭訥爾經額曰直隸大名地方與豫  
接壤黃河口岸尤關緊要急宜嚴密設防該督調撥  
精兵令總兵董占元統帶督同員弁分路守禦並飭  
藩司張集馨已革副都統德順帶兵前赴大名會同

該總兵擇要屯駐計前後調撥防兵共有五千名布置情形尙屬周妥現署正定鎮之山東兗州鎮總兵花里雅遜布尙未起程赴任著准其暫留直隸會同防堵惟賊情詭譎避實擊虛是其慣技務宜分設偵探嚴密查訪一有賊蹤迅速迎頭截擊如兵力不敷卽於附近各路官兵趕緊調撥移緩就急總期聲勢聯絡互相策應斷不可株守一隅致令顧此失彼山

東河南毗連各要隘有需協剿之處卽飭令帶兵大員出境會剿更可自固藩籬該督出省應駐紮何處督辦著卽酌量情形相機調度朕亦不爲遙制

同日雷以誠奏言臣探得揚州已有可克之機各軍應卽合力圍攻不宜更調他處現聞琦善已奏調勝保帶兵前赴鳳陽臣竊以爲不可蓋鳳陽一帶已有周天爵呂賢基等兵力不爲不

厚並聞賊匪在彼曾受大創所餘祇二三千人  
似尙不足爲慮揚城此時功在垂成若調開一  
面之兵是授之隙也且勝保紮營西面正杜賊  
匪西奔六合滁州等處之要路若兵一移動賊  
匪尾而及之勝保一軍不前後受敵乎爲今之  
計宜俟揚城克復再行引兵前進方爲善策應  
請

旨飭下勝保從緩起程以便合力攻克揚郡奏入

上命軍機大臣傳諭琦善陳金綬雷以誠曰現在賊匪  
已由皖入豫周天爵等竟未能堵截以致攻陷歸德  
北省情形萬分喫緊必應先其所急勝保諒已帶兵  
起程著琦善催令前進毋稍遲滯至揚城賊匪困守  
已久該大臣等務當懷遵疊降諭旨迅圖克復勿致  
該逆再行分竄琦善自到揚州初猶奮勉逮賊圍至



雖亦屢獲小勝總未大挫賊鋒頗不如前汝係曾經  
獲罪之人朕知汝之才故特用汝汝不能收一蕞爾  
揚城朕爲汝實覺愧憤此時不迅圖克復更待何時  
著限於季夏以前全行掃滅不致又有他虞福濟計  
已到任與查文經嚴扼灣頭一帶合力進攻雷以誠  
在仙女廟等處勸諭練勇亦足以資策應慧成業已  
有旨令其折回河北剿賊徐州糧臺應如何分設其

保護糧臺兵丁應留若干並著琦善咨明懋成酌量辦理

同日詹事府少詹事王履謙奏言伏查黃河南北兩岸爲行旅往來要道如欲官渡肅清必先嚴絕私渡如恐行旅擾累必先嚴禁書差臣卽飭地方河工各員遵照章程辦理復面諭認真盤查毋稍疏懈黃河東西綿亙五百餘里斷難

各處派兵防堵儻有警報惟有恪遵

諭旨將南岸船隻撤歸北岸臣當周歷巡查嚴飭廳縣營汛格外認真稽防免致貽誤

王履謙又奏言臣初三日由上游查勘後擬往下游各口巡查頃聞省城緊急柳園口係省城衝途日來紛紛遷徙過渡者不知凡幾臣恐別滋事端逐日親往稽查彈壓儻探有警信卽將

船隻收歸北岸員外郎邵懿辰駐紮山東劉家  
口亦已函致照此辦理榮澤孟津兩口尤爲商  
旅輻輳之所帆檣林立恐奸匪藉此生心委員  
難期得力擬再趕往相機辦理奏入

上命軍機大臣傳諭王履謙長臻邵懿辰曰黃河上下  
游各渡口早經李德暨前河督福濟等加意防範何  
以賊匪一到仍得搶船渡河據王履謙奏稱山東劉

家口係邵懿辰駐紮之地當逆匪撲來自必飭令地方官將船隻收歸北岸何以忽有偷渡之事著長臻查明情節將疏防渡口之文武員弁一併叅處現在李德已調兵前往恩華亦帶兵迎剿著該河督酌量情形有可派兵協剿之處卽行派員帶兵前往以爲聲援仍著王履謙等分飭地方文武嚴防黃河渡口勿令賊匪踵至自干咎戾

同日光祿寺少卿黃兆麟奏言本月十四日臣  
恭讀

上諭賽尙阿著發往直隸交訥爾經額差遣委用徐廣  
縉著發往河南交陸應穀差遣委用等因竊惟自古  
國家之所以驅策將士者惟此信賞必罰之權  
耳有功必賞而後軍中咸思奏功有罪必誅而  
後軍中咸知畏法方今逆賊縱橫一壞於賽尙

阿之失律乖方放賊入楚再壞於徐廣縉之退  
縮自保縱賊紛奔以我

朝二百餘年金甌鞏固之天下幾擾亂於二人之  
手其爲誤

國非等尋常前將賽尙阿等坐監待罪軍中猶懷  
然於貽誤軍事罪無可贖若令其帶罪圖功則  
咸以辦理乖誤仍可邀

恩自效竊恐南北諸軍之心盡行鬆懈所關實非淺鮮  
惟有籲懇

皇上宸衷獨斷

收回成命庶足以伸

國威而振軍心

同日翰林院侍讀孫鼎臣奏言竊惟逆匪流毒  
幾半天下始由賽尙阿之玩寇繼由徐廣縉之



集賢堂  
卷之四  
縱賊中外之人同深憤恨

皇上逮治其罪所以彰憲典而振軍威昨奉

諭旨賽尙阿著發往直隸交訥爾經額差遣委用徐廣  
縉著發往河南交陸應穀差遣委用等因在

皇上之意不欲其置身事外責令帶罪圖功臣愚以爲  
朝廷有功必賞有罪必誅立法森嚴不可倖逃況  
現在賊勢蔓延所至潰陷正望

特申威斷庶足懾人心之渙散若賽尙阿徐廣縉身負  
重罪且得逃出縲紲軍營大小各員見二人失  
律喪師其罰不過如此相率效尤何以制之且  
債軍之將聲威盡損卽令勉強思奮亦難望其  
有成伏願

皇上斷自宸衷

收回成命使天下知

聖人大公無我賞功罰罪法在必行則人無倖免之心  
士有爭先之氣矣均奏入

上諭內閣曰光祿寺少卿黃兆麟翰林院侍讀孫鼎臣  
奏失律之將不宜差遣自係正論惟現在賊竄豫境  
河南直隸均須辦理防堵賽尙阿徐廣縉係軍營獲  
罪大員豈得置身事外且該革員等前在軍營與賊  
接仗於賊情尙能略悉是以發交訥爾經額陸應穀

差遣責令帶罪自效並非將該革員等應得重罪遽行寬宥昨降諭旨甚明儻該革員等仍不知愧奮國法具在豈容倖免賞功罰罪朕心自有權衡大小臣工諒能共喻也

十七日辛酉吏部尙書賈楨刑部尙書翁心存都

察院左都御史朱鳳標奏言竊惟用兵之道貴洞燭乎先幾尤貴通籌夫全局統計徵調各路

精兵萃於淮揚者亦既不下數萬然未嘗嚴防  
後路以致別股之賊乘虛分竄徑過滁和復不  
能分兵撲滅俾得沿途裹聚由鳳陽而蒙城而  
亳州今歸德又失守矣賊距汴梁僅二百餘里  
勝保等雖已引兵而西然僅能追躡賊後江忠  
源甫由湖北東行折回趕到亦需時日誠恐逆  
匪聲東擊西由曹考蘭儀渡河關入山東直隸

界內則蔓延益不可問臣等目擊時艱謹公同酌擬防剿事宜六條以備

聖明採擇一扼河而守最爲目前要務宜速令東河總督河北鎮道分段帶兵防遏所有黃河船隻盡拘泊北岸毋以資賊並責成雷以誠王履謙等往來巡查並請

飭令恩華統帶吉林黑龍江官兵兼程前進於兗曹一

帶擇要駐紮山東巡撫南河漕運各總督分扼  
黃河南北兩岸以通驛路兼護糧臺其續調之  
山陝各處官兵令駐豫省曹考延津北岸嚴密  
防堵並防奸細潛窺河隄爲偷渡灌城之計其  
迤西孟津風陵等渡口一律嚴行防範至汴梁  
形如釜底萬難堅守宜令撫臣駐兵河干接仗  
較爲得勢並飛催勝保等星夜赴援毋稍延緩

貽誤一直隸大順廣一帶宜速調重兵防守上年十一月閒已調大名鎮兵一千前赴軍營則彼處兵力實形單薄宜抽撥精兵屯駐以壯聲威惟近京各鎮不可調撥過多致失居重馭輕之道似宜於保定正定調集重兵示以鎮靜儻有蠢動亦易勦擒一河南之偃師閩鄉靈寶爲古桃林殺函要塞山西之澤潞蒲津陝西之潼



商兩路宜令各督撫併力堵截杜賊西竄之路  
洛陽尤爲險要宜設嚴防一前調察哈爾土默  
特蒙古馬隊兵在察哈爾熱河分駐現在軍務  
緊急應否

密飭整頓軍裝器械並豫撥內庫銀以備軍需俟有徵  
調卽飛速進口內衛京畿外護山東山西兩省  
庶免遲延一京師九門內外堆撥宜實力整頓

巡查奸宄尤宜加緊應請

飭下步軍統領衙門順天府五城晝夜偵察密速查拏  
以防竊發再海運米石宜卽運入城內祿米等  
倉其通倉存儲糧石亦宜於海運事竣後陸續  
運入城內各倉請

密飭倉場侍郎務爲深遠之謀毋得瞻顧徇私藉詞欺  
飾致誤大計一逆賊負固金陵分踞揚鎮以綴

我師而潛向西北肆擾其計甚狡總師干者豈  
宜智出賊下乃各擁重兵相持不決若復遷延  
時日師老財匱事變疊生深爲可慮請

特降嚴旨責令琦善等剋期收復揚州和春等水師盡  
焚江中賊艦鄧紹良等進復鎮江然後江北之  
師肅清淮甸江南之師合剿金陵埽穴擒渠餘  
賊自易殄滅尤須

密飭向榮許乃釗等布置周密毋墮賊匪奸計俾竄出  
重圍又蹈永安道州覆轍以上各條似爲今日  
急務謹合詞繕摺具陳奏入

上命軍機大臣傳諭理藩院曰前因哲里木卓索圖昭  
烏達三盟以軍務未靖呈請由每盟各派兵丁一千  
名前赴軍營現在逆匪尙未殲除卽著哲里木卓索  
圖昭烏達三盟各派精壯兵丁一千名備齊軍裝火

藥並由該王公台吉塔布囊內揀派得力人員管帶  
前赴熱河圍場駐紮聽調該盟長等毋庸親身帶兵  
前來其軍餉火藥鉛丸等項已飭熱河都統毓書接  
濟矣該兵丁等至木蘭圍場時應如何駐紮操演之  
處著派總管那敷德與帶兵之王公等和衷訓練著  
理藩院將此旨由五百里傳諭該盟長等知之

上又命軍機大臣傳諭理藩院曰前因錫林郭勒盟長

多羅郡王齊旺扎布等因軍營馬匹不敷情願各捐馬三千匹應用現由東三盟咨調兵丁需用馬匹孔急卽著照該盟長郡王齊旺扎布等所請每盟各選驍壯馬三千匹護送熱河牧場交總管那敷德加意牧養以備咨調卽將此旨著理藩院由五百里傳諭該盟長等知之

同日誦爾經額奏言 臣疊奉

諭旨遵飭鎮道等督兵合剿惟現接長垣縣來稟探得河南蘭儀縣業已失守距該縣僅百餘里豫省境內黃河口岸現無重兵請趕緊調撥等情臣查黃河南北兩岸均屬豫省管轄直隸地面尙在北岸衛輝等三府之北該省河北鎮總兵係屬專管地面惟現當防剿緊急自應不分畛域嚴防黃河北岸以杜賊匪偷渡臣已飛飭大名

鎮董占元等先其所急將兵勇全行調赴黃河北岸駐紮並請

飭下河北鎮總兵帶兵會同晝夜巡防如有賊匪北渡卽併力開礮轟擊總期一賊不敢竄擾以重畿輔而固藩籬藩司張集馨運司楊需亦均令前赴黃河北岸會同鎮道熟籌妥辦至奉

飭調營馬三千匹臣已分別派調委員解至山東交恩



華行營應用仍俟察哈爾馬匹到日撥還各營  
以補調撥之數

訥爾經額又奏言 臣奉到

諭旨以省城大員祇有臬司能否得力

飭令豫爲酌度 臣查古北口現在地方靜謐署提 臣保

恆係統轄全省武職大員堪以調至省垣會同

臬司等駐守一俟抵保 臣當卽日前赴大名一

帶相機調度督兵防勦

同日直隸布政使張集馨奏言臣馳抵防所後  
督臣所調提標弁兵一千名宣化鎮兵五百名  
亦陸續踵至在臨洺關紮營操練大名鎮臣董  
占元商以大名府屬界連豫東兩省其中如長  
垣東明南樂數縣皆與黃河相距不遠尤關緊  
要所撥兵五百名不敷分布稟明督臣將提標

兵五百名撥交鎮臣帶往大名分撥防守督臣

又移調河閒防兵五百名天津鎮備調兵五百

名俱交鎮臣董占元調度惟路途較遠到防尙

需時日所恃者黃河天險可以保障畿疆當卽

飛咨少詹事臣王履謙囑其嚴防黃河渡口並

由臣札飭河南沿河各州縣將渡船概泊北岸

非公文摺報不准私渡第查黃河以北原野坦

平道途遼闊非有重兵勁旅互爲聲援不足以  
資抵禦且非多派馬隊難以跟蹤追勦惟有額  
懇

皇上天恩俯念畿疆緊要多派勁兵馬隊並乞

欽差大員統兵進勦扼要設防臣亦躬在行間隨同練  
習斷不敢畏難推諉

張集馨又奏言據長垣縣錫桂稟報河南甯陵

睢州蘭儀三州縣俱已失守長垣偏近蘭儀相  
隔一河現探賊勢甚重聚集在蘭儀四十五里  
之高小集地方萬分危急立等救援等語查長  
垣北岸尙係河南蘭儀縣境直省防兵五百名  
由鎮臣管帶分駐在長垣縣境蘭通集屯紮臣  
前派去提標兵五百名鎮臣欲安置東明今以  
長垣危險應仍令先赴長垣其臨洛關屯紮之

宣鎮兵一千名已飭趕緊起程赴大名府防堵  
惟通計已經到防弁兵僅二千名督臣續調之  
兵雖尙有二千五百名然總須按程行走而各  
州縣紛紛告急實屬顧此失彼查賊勢疾如風  
雨數日閒連陷河南數邑一經渡河萬難抵禦  
惟有仰懇

聖恩迅撥重兵加派大員兼程來防統兵進剿以重畿

輔而安人心均奏入

上命軍機大臣傳諭訥爾經額張集馨曰河南甯陵睢  
州蘭儀三州縣俱已失守現在賊匪聚集蘭儀四十  
五里之高小集地方長垣逼近該處僅隔一河情形  
萬分喫緊該署司已將提標兵五百名飭令先赴長  
垣並將臨洺關屯紮之宣鎮兵一千名飭令趕赴大  
名一帶防堵自應先其所急惟據稱到防弁兵僅二

千名未免仍形單弱此外該督所調之兵一時未能到齊著卽飭令帶兵各員趕緊前往黃河北岸一帶扼要堵截毋得稍有延誤直隸爲京師保障賊勢剽悍異常必須急派重兵嚴密堵禦著該督再於該省各營內酌調精兵源源接應並督同張集馨董占元等扼要截剿堵其北竄之路該督仍須趕緊出省督辦一切文報妥慎馳遞勿任稍有阻隔致誤事機



上又命軍機大臣傳諭訥爾經額曰張集馨奏賊蹤密  
邇到防弁兵僅二千名已諭令該督飭催帶兵各員  
趕緊前往並令該督出省督辦頃據奏稱已飛飭董  
占元花里雅遜布帶兵前赴黃河北岸駐紮惟所派  
各兵仍形單弱著卽添調各路重兵迅速前往合力  
堵剿毋任闖入直境該督亦應迅速出省督辦不必  
待保恆到省始起程也

上諭內閣曰逆匪竄擾河南歸德一帶已有旨諭令江南安徽各路統兵大員並陝甘山西添派精兵分路進剿矣本日據訥爾經額馳奏遵派張集馨楊需並飭大名鎮總兵董占元升任山東兗州鎮總兵花里雅遜布督帶提標大名宣化正定官兵先行馳赴河北會同河北鎮總兵專辦防剿事宜訥爾經額卽日出省督兵接應現在東三盟蒙古王哲里木盟長巴

圖卓索圖盟長色伯克多爾濟昭烏達盟長那木濟勒旺楚克等各派蒙古勁兵由熱河圍場前來並調集察哈爾官兵近畿一帶大兵雲集著訥爾經額卽督飭直隸帶兵大員奮勇前進以爲山東河南後路應援京師十萬禁兵均已簡調齊備諒茲么膺小醜裹脅匪徒定可指日殲除也

同日陸應穀奏言本月十三日據報賊之前隊

約二千餘人已由陳留赴省臣原帶兵勇三千有餘自歸德失利後各兵潰散不少連日收集僅數百名軍火器械半多不堪應用所調永城防兵南鎮官兵均未到營臣隨身兵勇止百餘名實不足以資攻勦至省城防兵通計不過二千餘名鄉勇二千餘名城大兵單萬難支持且賊已踞劉家口又占睢州壩勢將渡河北岸情

形尤爲喫緊 臣趕緊催提各兵飛速馳赴省城  
西北一帶扼要剿截惟賊衆數萬 臣現無一旅  
之師而又乏可靠之將束手無策祇可竭盡心  
力以期補救所有前懇

飭調慧成暨各路援兵仰祈

迅賜飛催來豫庶省城可保無虞而河北亦有防備矣  
陸應穀又奏言逆賊自揚州竄出以來在事諸

臣皆以爲僅一二千人無足爲慮臣在歸德以數千之師與賊轉戰三日親見賊匪以數百人爲一隊有進無退又往往從後抄裏其由亳至汴者約計在數萬以外又據探稱由陳留至省路中橫排二三十里賊勢如此其大而猶云無慮是直粉飾目前以爲推卸地步今日之汴梁危在旦夕以周圍二十餘里之城兵勇僅止四

千萬萬不敷分布況黃河逼近萬一賊人決河  
灌城則人皆魚鼈至河北渡口太多賊若於汴  
梁得手則可渡者不止一處河北之防守宜嚴  
而

神京之豫備尤宜早伏乞

皇上添調精兵保衛京城旣可以爲進攻之用又足以  
備豫不虞

同日沈兆澐林揚祖奏言臣等自初十日會同署開歸道張昀等辦理防守事宜十二日據報賊匪已至陳留分股來省十三日辰刻臣等在城上見有賊自東南紛紛而來於省城東南兩面往來攻撲賊情詭詐未能測其多寡而兵勢旣單城中居民大半逃避無臣聞在陳州一帶數日內未接文報臣等督同官兵並招募民夫



嬰城固守勢甚危急惟有仰懇

聖恩速飭直隸山東等省並臨洺關駐紮官兵就近星  
夜來汴以資救援庶得內外夾擊淨掃妖氛均  
奏八

上命軍機大臣傳諭陸應穀沈兆澣林揚祖曰賊衆於  
十三日辰刻自東南紛紛而來在省城東南兩面攻  
撲城內兵力旣單陸應穀原帶兵勇自歸德失利後

潰散不少現在汴省情形萬分喫重本日已諭令舒  
興阿迅帶陝甘精兵四五千名馳往河南周天爵統  
帶兵勇已於十一日馳抵永城勝保亦帶兵於十二  
日起程本日復諭令趕赴汴梁應援托明阿及善祿  
等諒均帶兵趕到陸應穀一俟調兵稍集卽與周天  
爵托明阿勝保等合力奮擊以保危城現在兵力不  
敷該處團練鄉勇亦可藉資策應該撫卽出示廣爲

曉諭令其家自爲守人自爲戰如有殺賊立功者一面奏聞一面卽破格優加獎賞至賊衆數萬多係沿途裹脅之人有無可以設法解散之處著該撫相機辦理豫省人心固結朕所素知沈兆雲等務當激勵兵民嬰城固守以待援兵指日大兵雲集會合夾攻諒不難轉危爲安也並著該撫飛飭署河北鎮總兵崇安嚴防北岸毋稍疏虞

上又命軍機大臣傳諭托明阿奕經善祿曰前因逆匪竄入河南諭令托明阿奕經善祿督兵迅速赴援本日據陸應穀奏賊匪竄至汴梁往來攻撲城中兵力單弱難以支持情形萬分緊急著托明阿奕經善祿等統帶官兵兼程前赴汴梁會合陸應穀等併力夾擊以解豫省危急並遏賊匪北竄之路奕經善祿所帶各兵均歸托明阿調遣該將軍務與該侍郎提督

奮力督剿迅殄賊氛毋稍延誤

上又命軍機大臣傳諭舒倫保舒興阿張祥河曰前因逆匪竄入河南降旨令舒興阿撥兵四五千名派員由河南分起前進本日據陸應穀等奏賊匪已竄至汴梁河南省城情形萬分喫重著舒興阿迅卽親帶官兵馳赴河南合力進剿如山東直隸情形緊要仍遵前旨北行追剿毋稍遲誤其陝豫交界地方著舒

倫保張祥河扼要設防不可稍涉大意

上又命軍機大臣傳諭周天爵曰現在逆匪竄至汴梁往來攻撲城中兵勇不過四千餘名此股賊匪由鳳陽竄出周天爵援應已屬遲延刻下河南省城萬分危急若再不奮力窮追汴梁設有疏虞將何以對朕耶周天爵著仍遵前旨督帶兵勇迅速兼程馳赴汴梁內外夾攻旣可以救大梁之危卽可以遏北竄之

路

上又命軍機大臣傳諭華山泰曰前有旨令察哈爾都統豫備馬隊官兵四千名赴張家口屯駐備調現在賊匪竄至河南畿輔重地自應豫爲防範著華山泰迅卽統帶此項官兵來京聽候調遣再前調察哈爾馬五千匹計已解赴直隸山西兩省著再挑騰壯馬五千匹迅解來京以備官兵乘騎其察哈爾都統著

盛桂暫行署理

同日勝保奏言臣前准琦善咨會由臣帶兵馳赴滁鳳追剿北竄之賊卽帶正定天津二鎮標兵一千名及先挑川勇三百名並琦善咨交湖廣壯勇六百名於五月十二日自司徒廟起程由安徽天長五河等縣一帶行走沿途探明賊蹤晝夜兼程相度機宜總期繞出賊前迎擊以



扼其北竄或賊竄在前當由間道設法截剿並  
遵

旨於續到官兵內酌量調撥前進仍先行飛咨奕經托  
明阿周天爵李嘉端等無論何處遇賊務須和  
衷商辦分路夾攻迅掃妖氛以紓

宸廑

勝保又奏言現由臣琦善撥來臣行營銀三萬

兩又帶赴臨淮營銀一萬二千兩交黑龍江馬  
隊統計僅敷兵勇一月之用若賊匪早就殄滅  
則糧臺不必另籌然賊蹤無定行止靡常設須  
添調兵丁勦辦恐距徐州糧臺稍遠卽難源源  
接濟可否仰懇

皇上飭令山東河南安徽等省於藩庫及鹽務項下隨  
時撥解到營以便接濟奏入

上命軍機大臣傳諭勝保曰賊匪現已竄徧汴梁勝保帶兵追剿無論行抵何處如糧臺未能源源接濟准其就近提動各府州縣庫銀倉穀以濟急需現在汴梁情形萬分喫緊勝保著卽星速前往救援毋稍遲誤

上諭內閣曰勝保已帶兵赴河南地方剿賊刑部侍郎雷以誠著卽幫辦軍務與琦善陳金綬督兵克復揚

城毋稍延緩

同日

上命軍機大臣傳諭恩華瑞昌李德曰前據恩華奏探聞賊匪由曹河上游搶船北渡當經諭令恩華等星速督兵前進扼要堵截數日以來該處情形如何朕心實深懸繫渡口船隻卽被該匪搶渡若趕緊截擊尙易剿散如有續來匪徒或乘其半渡邀擊或於水

路要隘處所豫伏官兵遏其登岸之路著恩華瑞昌  
李德相機妥辦務令大股賊匪不敢渡河竊伺則剿  
辦較易得手

同日

上諭內閣曰現在賊匪竄擾豫省已派大兵前往剿辦  
所有山東防剿事務著恩華瑞昌與李德專辦直隸  
防剿事務著訥爾經額督同張集馨董占元專辦

同日江忠源奏言臣於四月初七日自鄂起程  
初八日接署督臣張亮基撫臣崇綸札委順道  
勦辦廣濟縣匪徒二十一日准安徽撫臣飛咨  
粵匪分股竄擾滁州飭卽帶勇由捷徑馳赴豫  
皖界上扼要堵截二十五日復奉

旨俟廣濟事竣再赴江南臣於二十七日將大金坂巢  
穴焚燬並將張東銘捕獲餘匪膽落四散逃匿

現在大局已定交署提臣阿勒經阿接辦臣卽  
於初三日自廣濟帶勇起程初五日夜分行抵  
九江接到江西撫臣張芾等札稱賊船千餘隻  
乘風回竄九江存城兵力無多飭臣酌量緩急  
情形辦理如賊未過太平蕪湖卽會同江南官  
兵合力攻擊如賊已抵皖城卽折回九江下游  
一帶擇要扼剿初八日臣正在督派弁勇乘舟

前往接據探報賊匪分股回竄乘船千餘隻順  
風駛上已於初七日至彭澤縣臣急擬帶勇迎  
擊惟楚勇僅存一千二百餘名兵力單弱礮位  
全無江面寬至十餘里沿途無險可扼倉卒遇  
賊不惟攻擊難施兼恐措手莫及當卽督帶弁  
勇入城分垛堅守惟潯城過寬合計一千七百  
八十餘垛臣所帶楚勇不敷守垛之數九江存



城兵丁六百餘名皆係未經戰陣如果賊匪回竄攻城兵力過形單弱臣身受

聖恩惟有激勵將士竭力堵禦與城存亡仍一面飛探下游消息再行設法辦理

江忠源又奏言臣奉

旨幫辦軍務任大責重現在賊匪分股回竄大營隔絕聲息不通可否仰懇

天恩飭下雲貴湖南督撫臣簡派精兵數千飭令迅速  
來營交臣管帶臣並擬差弁歸里添募壯勇三  
千湊足萬人自成一軍兵力旣厚戰守有資臣  
當躬率將士竭力掃除與賊勢不兩立如有不  
效治臣之罪奏入

上命軍機大臣傳諭江忠源曰據奏賊匪回竄彭澤督  
帶兵勇駐守九江又兵勇單薄請飭雲貴湖南督撫

簡派精兵數千來營管帶等語九江爲江西湖北兩省關鍵賊旣回竄堵禦尤關緊要此時鳳陽之賊竄入河南江忠源馳往救援已恐緩不濟急著卽駐紮九江府城妥爲布置本日已諭令湖廣督撫迅調重兵前來策應另片奏擬差弁回湖南添募壯勇以資戰守具見急公惻忱此股賊匪中有無被脅難民堪以解散之處並著會同該撫張芾相機妥籌辦理現

在賊勢飄忽靡常儻由江西被擊逃散北省一帶情形緊急該臬司仍遵前旨先其所急馳赴救援毋稍拘泥

上又命軍機大臣傳諭吳文鎔吳振械蔣霽遠曰現在賊船回竄重擾安慶九江等處本日已諭令張亮基等揀派精兵數千名赴九江應援會剿惟念楚省現辦土匪正值需兵之際且調出各路官兵已復不少

仍須於滇黔兩省酌量調撥羅繞典如尙未到任著  
吳文鎔吳振械蔣蔚遠迅卽挑選精兵各二千名就  
近派員管帶馳赴湖南以備調遣

上又命軍機大臣傳諭張亮基駱秉章崇綸曰據江忠  
源奏所帶楚勇僅存一千二百餘名戰守俱形單弱  
著張亮基等迅卽揀派精兵數千名馳赴九江交江  
忠源管帶如能遏賊分竄亦可以保固楚省藩籬至

湖南現剿土匪亦屬需兵之際已諭令雲貴督撫調兵四千前赴湖南以備遞撥該署督等接奉此旨著卽先將本省兵酌調前赴江西諒能統籌全局先其所急斟酌辦理也